

DEPORTE LOKAL

WILLEMSTAD,---“Sigur algu bunita pa den un periodo asin’aki, na fin di aña, bo por ta serando aña i selebrando dianan di fiesta, hasiendo otro nan kontentu. Esaki ku donashonnan na nos hóben i muchanan, di parti Fundashon Bicentini.

Nan reakshon ta esun ku mas ta hasi impreshon, kual mi ta haña sumamente importante”, tabata palabranan di e konosido tékniko di futbòl, te ku resientemente tambe na kabes di nos selekshon nashonal di futbòl, Remko Bicentini.

Remko ta di bishita na Kòrsou, pa asina selebrá

Fundashon Bicentini ku regalo i donashon pa fin di aña



Hóben futbolistanan barika hel, despues di e donashon ayera.

dianan di fiesta, pero ta kòr-

da riba esnan den neseditat. Despues di trapa pia na Kòrsou djarason último, ya ayera, Bicentini a kuminsá hasi algun habitante di nos isla kontentu.

“Ta ideal i sigur tremendo pa alegrá famianan ku no tin e fásil, durante di e dianan aki. Unda na un manera úniko ta malkriá nan pa asina nan tambe por disfrutá di un sena di Pasku entre otro i pasa dushi dianan di Pasku.

Luna pasá nos tabata na Kòrsou kaba i a duna un man na hopi den neseditat, speshal ku artíkulonnan di enseñansa i di deporte i tambe e guia, pa asina inkluso na skol, por hasi aktividatnan di deporte, manera ta nos tradishon di e último 15 añanan”, Bicentini a sigui splika.

Mas aleu el a indiká na Deporte Vigilante, ku 15 aña despues, sigur Fundashon Bicentini ta orguyoso di mira adelanto, kual ta hasi di e hóbenan sigur un mihó persona den komunidad, ku nan desaroyo.

Embhadornan di e fundashon riba nos isla, ta aktivo hinter aña ku proyektonan pa hóbenan di ménos rekurso. Esakinan ta risibí materialnan deportivo, manera pañanan deportivo, sapatu i demas

artíkulonnan, ku inkluso despues di oranan di skol por hasi uzo di dje,

Ta e intenshon awor, pa hasi donashon na diferente skolnan, di balanan di mini futbòl, kual sigur ta yuda e muchanan su desaroyo, pa nan propio kurpa i pa ku e deporte di futbòl. Esaki ta importantísimo pa muchanan di entre 6 te ku 12 aña di edad.

Sport Uni Brion Trappers E organisashon barika hel di Kintjan, S.U.B.T. i Fundashon Bicentini, ya pa un periodo ta huntando. Relashoná ku esaki i komo regalo i un bon rekuerto, a hasi entrega di algun paña pa training pa e hóben futbolistanan di e ekiponan kategoria U-17 i U-20, di e organisashon.

Koperashon

Esaki ta danki na ayudo di diferente organisashon di futbòl na tera friu, ku ta yuda Fundashon Bicentini pa yuda nos muchanan i organisashonnan lokal.

E animo pa futbòl riba nos isla, entre nos hóben i muchanan ta grandi, kual ta motibu tambe ku Remko i su crew, lo organisá próksimamente klínika i aktividatnan sosial, den bario.

Un biaha pa aña e fundashon ta sostené un meta nobo, unda ku ta hasi posibel, ku esnan ku lo kier bini na remarke durante di aña 2024, por komuniká for di awor via info@bicentini-foundation.org.



Remko Bicentini, kende huntando ku su fundashon, ta sigui duna bèk na Kòrsou.

Maestro internashonal for di Haiti den torneo di dam na Kòrsou

WILLEMSTAD---Despues di último eventonan di dam, pa miembranan di e federashon lokal di dam entre otro, ata e gran oportunitat pa bo tambe kompetí. Esaki unda ku inskripshon pa partisipá ta grátis.

Lo bai ta un torneo di dam rápido habrí pa sera aña 2023, ku ta mira akshon otro siman djaweps, dia 28 desèmber 2023, na e sede ofisial di e federashon.

Komo e chèri riba e bolo pa e evento aki, bo partisipashon ta sin gastu, unda ku tin premio di 500 florin. E gran hungadó i maestro internashonal, for di Haiti, Talien Louis, a konfirmá



Ken ta logra e último titulo di aña 2023 den dam riba nos isla ?

su presensia, unda awor a keda pa abo, tambe ta parti di e definitivamente último kompetensia di dam, pa e aña aki. Naturalmente e grandinan den e deporte aki riba nos isla, tambe lo kompetí, manera entre otro es-

nan ku a bin ta dominá den e último kompetensianan.

Riba dia 28 lo inisiá 7’or di anochi, despues ku por registrá for di 5’or di atardi. Dirigentenan di dam, ta konta ku bo partisipashon.

Di 2 buèlta den di 2 divishon FFK

WILLEMSTAD---Djaluna dia 15 yanüari 2024, ta fecha ku e di 2 buèlta di e di 2 divishon di futbòl FFK, lo ranka sali. Un ke otro na momentu ku tin 2 wega programá pa mira akshon.

Ámbos lo hunga riba tereno den Stadion Rignaal ‘Jean’ Francisca na Brievengat. Den promé ora, pa 7’or di anochi, FC Inter lo enfrentá Sithoc. Miéntas ku pa 9’or di anochi, Hubentut Fortuna ta sali kontra di Indekor.

Tur esaki despues ku ya e 10 ekiponan a hunga 9 wega di promé buèlta i ku tambe futbòl FFK a konkluí pa e aña aki.